



Inatsisartunut ilaasortaq
Emanuel Nûko
Naleraq

29-07-2022
Sags nr. 2022 - 14905
Akt. id. 20703478

Postboks 260
3900 Nuuk
Tlf. (+299) 34 50 00
Fax (+299) 34 63 64
E-mail: isn@nanoq.gl
www.naalakkersuisut.gl

Meeqqanut tapiissutit pillugit § 37 naapertorlugu apeqqummut nr. 145/2022-imut akissuteqaat

Asasara Emanuel Nûko.

Apeqqutinut qujanaq. Apeqqutit ataasiakkaarlugit ataani allanneqarput, kingornatigullu akissutaat.

1. Nunatsinni meeqqat 18 inorlugit ukiullit qassiuppat?

Kalaallit Nunaanni Naatsorsueqqissaartarfik malillugu ulloq 1. januar 2022 Kalaallit Nunaanni meeqqat 18-it inorlugit ukiullit 13.768-iupput.

<https://stat.gl/dialog/topmain.asp?lang=da&subject=Befolkning&sc=BE>

2. Kikkut tapiissutininik pisartagaqarsinnaatitaappat?

Meeqqanut tapiissutit pillugit Inatsisartut inatsisaat nr. 9-mi, 7. december 2009-meersumi § 1 malillugu piumasaqaatinik naammassinnittut meeqqat tamarmik tapiissutisisinnaatitaapput.

Tamanna isumaqarpoq meeqqanut tapiissutininik pisinnaatitaavoq, piumasaqaatit makkua naammassineqarpata:

- 1) meeraq 18-it inorlugit ukioqassasoq,
- 2) meeraq Kalaallit Nunaanni kommunimi innuttaaffeqartussaasoq aamma meeqqanut tapiissutininik tiguisinnaatitaasoq Kalaallit Nunaanni aalajangersimasumik najugaqartuullunilu inuit aqqisa allattorsimaffianni nalunaarsorneqarsimassasoq,
- 3) meeraq meeqqanulluunniit tapiissutininik tiguisinnaatitaasoq qallunaatut innuttaassuseqassasoq, imaluunniit meeraq meeqqanulluunniit tapiissutininik tiguisinnaatitaasoq ukiumi kingullermi Kalaallit Nunaanni najugaqarsimassasoq,
- 4) meeraq meeqqanik inuusuttunillu ikiorsiisarneq pillugu peqqussut tunngavigalugu pisortanit angerlarsimaffiup avataanut inissinneqarsimassanngitsoq imaluunniit pisortanit allatigut pilersorneqartoq aamma
- 5) meeraq katissimassanngitsoq.



Meeqqanut tapiissutit pillugit qinnuteqartoqassanngilaq. Piumasaqaatit naammassineqarpata tapiissutit tunniunneqartarput.

3. Meeqqat qassit pissarsineq ajorpat meeqqanut tapinik?

Kalaallit Nunaanni Naatsorsueqqissaartarfik malillugu 2021-mi angajoqqaat 3.653-it minnerpaamik meeqqamut ataatsimut meeqqanut tapiissutinik tunineqarput. Tamanna isumaqarpoq ikinnerpaamik meeqqat 6.301-it meeqqanut tapiissutisisinnaatitaasut, tassami ilaqtariit sisamanik amerlanerusunilluunniit meerartallit immikkoortumut ataatsimut kattullugit inissinneqartarmata.

Taamaasillutik meeqqat 7.467-it miss. meeqqanut tapiissutinik tunineqanngillat.

<https://stat.gl/dialog/main.asp?lang=da&sc=SO&version=202202>.

Amerlanerpaanut pissutaasartoq tassaavoq angajoqqaat isertitaat tunngavigalugit meeqqanut tapiissutit ukiumut 1.200 kr. ataallugit iluarsineqartarmat, taamaattumillu tunniunneqarneq ajorlutik. Imaassinnaavoq aamma meeraq angerlarsimaffiup avataanut inissinneqarsimasoq pisortaniillu pilersorneqarluni, imaluunniit piumasaqaatit ilai apeqqummi 2-mi akissummiittut naammassineqarsimanngitsut.

4. Meeqqat nunarput tamaat isigalugu tamarmik tapiissutinik pissarsisalerpata qanoq naleqassava?

2022-mut aningaasanut inatsit malillugu meeqqanut tapiissutinut 45 mio. kr.-it miss. immikkoortinneqarput. Taamaasillutik meeqqat tamarmik meeqqanut tapiissutinik pisinnaatitaasut meeqqanut tapiissutinik tunineqarput.

Meeqqat angajoqqaavisa isertitaat ima qaffasitsigippata meeqqanut tapiissutit ukiumut 1.200 kr-it ataallugit naatsorsorneqarlutik, meeqqanut tapiissutisisinneqarneq ajorput.

Taamaattumik malittarisassat atuuttut malillugit ukiumut 45 mio. kr.-it miss. akeqarpoq.

5. Meeqqat 18 inorlugit ukiullit angajoqqaat isertitaat apeqqutaatinnagit tamarmik pissarsilerpata pisortanut aningaasatigut aammalu allaffissornikkut qanoq naleqartigissava?

Meeqqanut tapiissutitut immikkoortinneqartut tunniunneqartullu ullumikkut namminneq ingerlaartuupput, tamaattumik pisortat isumalluutaat suliassanut naleqqiullugit amerleriaateqarpallaassanngillat. Imaassinnaavoq allaffissornikkut suliassat annertuseriarsinnaasut sulianik pilersitsineq tunniunneqartunillu misissuineq eqqarsaatigalugit.

Meeqqat tamarmik 18-it inorlugit ukiullit angajoqqaat isertitaat apeqqutaatinnagit meeqqanut tapiissutinik pissarsisalissappata, maannakkut tunniunneqartartut isigalugit meeqqamut ataatsimut ukiumut annerpaamik 9.093 kr-inik ukiumut 125 mio. kr.-it miss. pisortat aningaasartuuteqarnerannik kinguneqartussaassaaq, imaluunniit pisortat aningaasartuutaat maannakkumut naleqqiullugit ukiumut 80 mio. kr.-it miss. qaffassasut.

6. Namminersorlutik ingerlatalinnut allaffissornikkut qanoq naleqassava?



Namminersortunut kinguneqassaaq ilaqutariit isertitakitsut annerusumik misiginaviangikkaat. Ilaqutariit ima isertitaqartigisut meeqqanut tapiissutinik ilanngaanneqartariaqarlutik, misigissavaat qaammatit tamaasa aningaasanik amerlanerusunik pissarsisarnissaq.

Ataatsimut isigalugu tamanna isumaqassaaq, aningaasaqarnikkut isumalluuteqarnerusut amerlanerusunik aningaasaqarnikkut isumalluuteqalersut. Ilaqutariit isertitakitsut aningaasaqarnikkut isumalluutinik amerlanerusunik misigisaqarnaviangillat.

7. Innuttaasunut aningaasatigut allaffissornikkullu qanoq naleqassava?

Innuttaasut ilaannut meeraqanngitsunut inuttut isumaqarnaviangilaq. Innuttaasunut meeralinnut ilaqutariinnut isertitakitsunut aamma isumaqarnaviangilaq. Ilaqutariinnut aaqqiissuteqarnissamut killissarititaq sinnerlugu isertitaqartunut taamaattumillu maannakkut malittarisassat malillugit meeqqanut tapiissutinik tunineqartanngitsunut, isumaqarpoq ukiumut meeqqanut tapiissutinik 9.093 kr.-inik tunineqartalissasut.

Aningaasaliissuteqarsinnaaneq innuttaasunut toqqaannanngitsumik kinguneqartussaavoq, tassami aningaasartuutit amerlinerannut aningaasat pisortat missingersuutaanni allatigut nassaarineqassammata, taamaasillunilu suliaasaqarfiit allat aningaasanik annaasaqarlutik.

Maannakkut malittarisassat malillugit innuttaasunut saniatigut allaffissornikkut kinguneqassanngilaq.

Inussiarnersumik inuulluaqqusillunga

Jess Svane